

每週經課朗誦經文(巴克禮漢羅/教羅)2014/03/16

共同經課 - 1

創世記十二章一節~四 a 節

1 耶和華對亞伯蘭講，你 tiòh 離開本地、本族，老父 ê 家，去我所 beh 指示你 ê 地。2 我 beh hō 你成做大國，我 beh 賜福你，hō 你 ê 名做大，你亦 beh hō 人得 tiòh 福氣；3 祝福你 ê，我 beh 賜福 hō in；咒詛你 ê，我 beh 責罰伊；地上萬族 beh 因為你得 tiòh 福氣。4 亞伯蘭照耶和華吩咐 ê 話，就去；羅得亦 kap 伊去。

共同經課 - 2

詩篇一百二十一篇

1 上崎 á ê 詩。1) 我 beh kiáh 目 òng 山；我 ê 幫贊 tùi toh 落來？2 我 ê 幫贊 tùi 耶和華來；伊是創造天地 ê。3 伊無 beh hō 你 ê 腳搖 choah；保守你 ê 的確無 tuh 眠。4 看 ah，保守以色列 ê，也無 tuh 眠，也無暍去。5 保守你 ê 是耶和華；耶和華 tī 你 ê chiáⁿ-pèng 做你 ê 蔭影。6 日時太陽無傷你，暝時月亦 boē 害你。7 耶和華 beh 保守你，免受一切 ê 災害；伊 beh 保守你 ê 性命。8 你出，你入，耶和華 beh 保守你，Tùi chit 時直到永遠。

共同經課 - 3

羅馬書四章一節~五節，十三節~十七節

1 Án-ni 咱 beh 講，咱肉體 ê 祖亞伯拉罕有得 tiòh 甚麼？2 因為亞伯拉罕若 tùi 所行得 tiòh 稱做義，就 thang 誇口；總是 tùi 上帝本是無。3 因為聖經講甚麼？亞伯拉罕信上帝，就 kā 伊算做義。4 Taⁿ 見若做工 ê，伊 ê 工錢無算是恩典，算是應該 ê。5 若是無做工 ê，獨獨信 hit-ê 稱不虔 ê 人做義 ê，伊 ê 信就 kā 伊算做義。13 因為所應允亞伯拉罕 kap 伊 ê 後裔做後嗣承接世間 ê，m̄ 是 tùi 律法，是 tùi 信 ê 義。14 因為若屬律法 ê 做後嗣，信就歸 tī 空空，應允也廢無。15 因為律法是致到受氣；若無律法，就無犯 tiòh。16 所以是 tùi 信，thang 照恩典，beh hō 應允堅固 tī 眾後裔，m̄-nā tī hit-ê 屬律法 ê，也 tī 屬亞伯拉罕 ê 信 ê，17 伊 tī 伊所信 ê 上帝 ê 面前做咱眾人 ê 父，就是 hit-ê hō 死人 koh 活，叫 hiah-ê 無 ê ná 親像有 ê ê 上帝；照所記載講，我設立你做 choē-choē 邦國 ê 父。

共同經課 - 4

約翰福音三章一節~十七節

1 耶穌 kap 尼哥底母有一個法利賽人，名尼哥底某，是猶太人 ê 官；2 暝時來就近耶穌，對伊講，拉比，阮知你做先生，是 tùi 上帝來 ê；因為若 m̄ 是上帝 kap 伊 tī-teh，就無人能行你所行 chiah-ê 神蹟。3 耶穌應伊，講，我實實 kā 你講，人若無重頭生，就 boē 會看見上帝 ê 國。4 尼哥底某對伊講，人已經老，怎樣會重頭生？kiám 會 koh 入老母 ê 腹肚來生 mah？5 耶穌應講，我實實 kā 你講，人若無 tùi 水 tùi 聖神來生，就 boē 會入上帝 ê 國。6 Tùi 肉體生 ê 是肉體；tùi 神生 ê 是神。7 我講，Lín 的確 tiòh 重頭生，你莫得掠做奇怪。8 風 chhut-chāi 意思來吹，你聽見伊 ê 聲，m̄ 知伊 tùi tá-lòh 來，tá-lòh 去；見若 tùi 神生 ê 亦是 án-ni。9 尼哥底某應伊講，怎樣會 án-ni ah？10 耶穌應伊講，你做以色列 ê 先生，也 m̄ 知這 mah？11 我實實 kā 你講，阮是講阮所知 ê，干證阮所看見 ê；但是 lín m̄ 接納阮 ê 干證。12 我 kā lín 講地上 ê 事，lín 尚且 m̄ 信；若 kā lín 講天頂 ê 事，lín thài beh 信？13 無人 bat 上天；只有 tī 天裡 ê 人子，tùi 天降落 ê nā-tiāⁿ。14 Koh 親像摩西舉起蛇 tī 曠野，人子亦的確 tiòh án-ni 受舉起；15 hō 見若信 ê 人 tiàm-tī 伊有永活。16 因為上帝將獨生 ê kiáⁿ 賞賜世間，hō 見若信伊 ê 人 boē 沉淪，會得 tiòh 永活；伊疼世間到 án-ni。17 因為上帝差 Kiáⁿ 入世間，m̄ 是 beh 審判世間；是 beh hō 世間對伊得 tiòh 救。